

近代中國史料叢刊第六十五輯
沈雲龍主編

樊山政書
樊增祥撰

文海出版社
有限公司印行

樊山政書自序

昔余宰渭南六年嘗哀其公牘批判付諸剗削已數千部流布人間矣光緒己亥春開缺以道府用辛丑夏遂擢秦臬秋攝秦藩事其自治文牘一如爲令長時每一批詞挂發吏民傳寫殆徧癸卯以後秦中官報卽以吾公牘爲資料積久手藁多至盈尺戊申秋蒞江藩任時新政繁興公私困匱事冗於秦者數倍然亦時有批荅爲人傳誦吾鄉李茹真大令勸付排印以供眾覽乃發陳臬以後之公牘自辛丑迄庚戌凡十年釐爲二十卷名曰樊山政書屬夏午貽編修校讎刪訂而付李君督

匠排印曩張文襄師最愛鄙文每秦報至鄂欣然披覽時對僚屬誦之且曰雲門下筆有神每言出若口必與人異已而曰藩司官不爲小而好作諧語是其一病感念斯言爲之泣下今汰其甚遊戲者而仍間存諧語聊志吾過且實師言也宣統二年七月二十五日恩施樊增祥書

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件广告宣传页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



樊山政書卷一

恩施樊增祥嘉父

批鳳翔縣武生嚴桂芳控詞

陝臬任內稟

民間無論何項生理行頭抽用錢鋪家幫行用乃閭閻
通例也該武生既開酒店行頭自應收幫今雖歇業然
既被控押追必係從前拖欠未清之故何得逞刁上控
而且兩呈併遞一請提訊一請寬免細故固無提訊之
理飾訴亦無寬免之由仰新任黃令秉公斷結無任劣
生恃矜來轅曉瀆切切詞不遵式姑寬免責卽仰該武
生迅回鳳翔投案勿延詞發仍繳

批華州里民局紳劉殿魁稟詞

閱稟不甚可信官車局之設係屬奏定章程原因歲歉
差繁藉紓民力潼關渭南各設一局以便與省城總局
通氣潼渭兩局通支東路五廳州縣之差非渭局管渭
潼局管潼置臨潼二華於不顧也茲據稟稱華州兵差
仍由該州里局供支車輛渭南官車局不但不管華州
里局之事且將華車全打過站實屬無此情理候移會
善後局飛飭渭南委員明白稟復以後東路五屬之差
一體兼支協助勿少偏枯車輛各送各站隨到隨卸隨
卸隨回勿得輕打過站惟官車局遇有需車較多僱覓

不及之時乃須藉本地官紳之力竭力幫催價由局發此皆一定章程因該生等不明此意特爲宣諭仰卽回局妥慎辦公勿延此飭

批臨潼縣民孫世定等控詞

稟詞未免過火孫世定以從九而當鄉約其不立品可知鎮約既非馬牙縣差胡魁何能向爾等勒要馬匹爾等卽居然買馬三匹輸之縣廐均屬可怪爾豈不知一次是情二次是例爾等既自開其端此時又迭控不止實屬糊塗刁妄姑仰西安府轉飭臨潼縣錄案稟奪勿延

批發遣人犯李從模呈詞

此案現奉撫憲批司核議查該犯非官也身為人子而為其父列款首送依律問擬發遣黑龍江當差茲於起解之時忽稱身係廕生州判請照官犯例委員護解前進在該犯之意不過欲借官犯名目為沿途逗遛訛詐錢文之計殊不知身為逆子人人得而誅之爾尙欲展平日棍徒伎倆耶仰候卽日發遣安置所懇照曾任職官例派員伴送之處應不准行

批醴泉縣貢生羅經權等稟詞

胡令到醴泉任甫及半年並無更易之說該紳等何必

預後

此宏

賑禾

員比

被地

守令

德遠

端推

原社

循切切稟發仍繳。

批定遼廳民蕭登清控詞

本日接兩呈皆定遼廳民何彼之好訟也稟詞支離荒誕無情無理不准。

批白河縣民張肇忻控族叔張雲詞

胡說不准

批紫陽縣民馬家駿控詞

爾以紫陽縣民不遠千里來省上控而所控者無非買賣田地錢財膠葛之事輒敢指控被證九人之多其健訟拖累已可概見本應懲責押遞姑寬申飭現在興安

張太守回任在卽、公廉明決、今之召杜、爾如實有冤抑、就近赴府控訴、勿得來轅攀誣、妄瀆干咎、此飭。

批定遠廳民婦李張氏控詞

爲買賣田地之故、與族眾結訟不休、輒欲本司提人於千里之外、居心陰毒已極、不准。

批石泉縣民吳興武控詞

石泉縣呂令、誠屬顛預、然決無故縱正兇、自擔四參處分之理、爾父被竊賊刀戳九傷、致斃原差、獲犯自應帶赴縣城、何以將該兇犯帶至事主家中對質、兇犯到堂卽三木在前、猶不吐實、何以張堯成等一到爾家、卽自

認竊財殺人，不諱。地方官遇有命案，幸獲正兇，惟恐其狡供避罪，豈有當堂教令翻供之理？呈尾謂呂令清訟冊多是具文，此因本司前札飭興安府謂呂令造齋清訟冊籍荒唐敷衍，爾遂援爲口實，冀激本司之怒，准爾呈詞。爾之熟衙慣訟，亦可見矣。試問呂令造冊不實，爾一細民從何得知，不准併飭。

批保甲局陶令清摺

清摺閱悉，劉德潛貪詐無恥，挾嫌妄控，該印委僅予申飭，未免過於仁厚。惟案已訖結，姑予查銷。以後劉德潛倘再肆矯誣，定行詳責不貸。

批咸陽縣稟

石令假借隄工報効，朦混列保，儼然道員，赴豫買糧，言不顧行跡，其行事所謂反中庸而無忌憚者也。此次咸陽交代，援涂故令之例，預支一月夫馬工料銀二百八十餘兩，實屬歷任所無，以保升之生觀察，而自同於革職之死知縣，不惟無恥，抑亦不祥。此人果至監司，何錢不要，何事不爲，所請預支驛站正項一節，本司衙門未據稟陳有案，查交代係藩司主政，驛站則本司專責，石令並不關白，輒敢平空列抵，實屬膽大妄爲，著於交抵摺內，先將此款刪除，再同監交，三面清算，勿任狡賴取

巧切切仍候藩司暨糧道批示繳

批邵陽縣武生曹殿奎稟詞

語多過火捏砌顯然姑仰同州府遴委妥員會同邵陽縣秉公集訊如虛照例坐誣勿稍徇縱切切詞發仍繳

批葭州陳牧澤霖報得雨稟

閱稟慰悉該牧曩在天津爲李恣伯夫子所激賞本司耳熟其名今茲小試牛刀不減武城弦誦惜哲人萎矣不得聞莞爾之音可勝嗟悵本司公冗未暇作函偶覽來牘奉寄數語以代面談此繳

批同官縣劉令稟

向來吾陝吏治甲於天下頃年以來漸開貪詐險刻風氣上司因吏情純實恒以寬厚待人屬吏因上司寬厚漸致肆無忌憚於是釐金委員有私雕假緘作姦犯科者候補公館有僕毆其主噤不敢發者膽大無恥官常蕩然茲據稟稱前任顧令與孫庭瑞等辦理同官賑務短發浮報請飭顧令照數持出庭瑞等歸案訊辦等語究竟賑銀賑糧是誰吞蝕並未查清如果顧令一人吞賑豈持出卽能了事如庭瑞等朋分圖利則顧令一人賠繳豈不偏枯該令到任以來一再稟訐前任是否無瑕戮人因公起見抑係交代挾嫌藉端報復顧令近在

本州知事
案
省垣仰卽日明白稟復聽候澈究仍候撫憲暨藩司糧道籌賑局批示繳

批三原縣六項月報清冊

本司六月初九日到任該縣近在三原於六月二十日具申猶用前署司之銜此卽糊塗昏憤之一端原冊一併擲還著據實另造每月有案若干一一註冊不准遺漏一案此飭

查閱來冊四月一月上控十六案自理無三原之民竟一月不打官司乎抑因該令不能問案不屑告狀乎該令覲顏注册深堪怪異以後倘再如此率意填寫定行

詳撤不貸

再閱五月一月每五日之中必報自理一案不少不多
竟是印板文字此係何等劣幕所爲仰卽日驅逐出署
免致該令受累

批客民黃鑫武呈詞

爾何時聘賈天益之女爲妻財禮若干何日在咸甯具
控旣經咸甯斷結何又歧控長安爾以崇陽客民在陝
作何生理家鄉豈無好女何以在此求婚向來上控呈
詞必牽控差人爲聳准之計長安朱令非差役所能朦
蔽者也仰卽赴縣投審定有公斷此呈不准

批長安縣紳民張鍾秀等呈詞

長安縣朱令，今之循吏。當此年饑穀貴，民命倒懸之時，如果倉正吳永春等將倉糧偷賣私吞，業經爾等屢控有案，豈有任聽門丁書差上下其手，不爲追究之理。此案仰長安縣迅速集訊，如吳永春果有侵吞，嚴追不貸。如賈魚辛等捏情妄控，亦卽秉公究懲。仍將訊斷情形據實稟復候奪，詞發仍繳碑文附。

批咸甯縣民謝文才呈詞

爾房屋爲黃姓霸佔，問官不問情由，將爾責打，判云房歸黃姓，興利二十年改准。六年令人不解，天下容有霸

房不騰之佃戶斷無如此糊塗之委員既經控府改發
長安審訊何必多此一控仰赴長安投案勿狡

批長安縣民孫廣智呈詞

據稱爾父同產五人二房故絕爾大伯之孫承嗣三房
亦絕爾胞弟承嗣本無官司可打突於去年秋間爾表
叔劉光祖忽言大房之孫不應爲二房之後遂令爾四
弟承嗣是爾一門吞併三門之業也此案若經本司審
斷爾姪孫丁承繼二門多年所有二門產業仍歸孫丁
承受爾四弟不得霸繼爾於爾大伯死後膽敢欺凌孤
寡勾串混帳無恥之劉光祖改繼奪業應將爾與光祖

痛撻久枷以爲貪狼喪良者戒仰長安縣查照批示事
理如法枷打勿稍輕縱切切必須孫張氏及其子孫丁
肯爲乞恩方准放孫廣智劉光祖出押詞發仍繳

批宜君縣民辛方保等呈詞

據稱爾等貧無立錐奄奄待斃何以荒旱一年之久居
然活到如今張登科等散賑不公乃闔縣疾首痛心之
事何以僅爾三人出頭說話爾辛方保乃極貧之饑民
何以具控到官旣罰錢十大串又被差役訛錢三十串
爾旣有此錢何得自稱貧民爾三人當雨澤已透之時
有田不耕不遠數百里來省上控其非善類可知仰卽

逃速回縣補種晚秋倘再纏瀆定卽押發不貸

批蒲城縣文童魏蘭華稟詞

本司幕中並不需人無從位置仰卽知照

批臨潼縣印委夏朱會稟

此案綜核前後案情馮黃氏之死爲馮西英父子致斃無疑此稱馮義殺媳栽誣荒謬萬狀不得以事無質證任其狡展逃刑仰臨潼縣迅卽依限審解以懲兇猾馮靳氏因其夫馮西英已死二子在押覲以一控翻案旣經該印委員等訊屬子虛應卽撤去誣詞專鞫正案馮春彥係原控正凶又係已死馮黃氏之小功服姪案關

服制病非垂危豈能聽其捏情保外着迅速定供收禁照例議罪勿延併移委員知照繳

批安康縣舉人鍾隆鑑呈詞

滿紙虛言意在聳准而適自彰其妄爾鍾姓欠龍姓之錢歷年清還有據嗣乃借荒拖抗債主呈控問官比追乃正理也來呈突作驚人之筆謂三月望日練役四十二餘人撞門入室將爾父母及爾一並毆打受傷到案後官將爾父掌嘴收禁果有如此冤情爾何以遲延百餘日之久始來呈控訟因帳債而起而被告多至四十五人實屬荒謬萬狀不准

批咸甯縣民薛源順呈詞

欠債還錢一定之理。爾不還錢。自然訟不得結。仰照讞局原斷。迅速清還。勿得瀆訟。此飭。

批白河縣文童彭金鰲呈詞

稟及粘單均悉。本司甫離赤緊。深知上控之案。十訟九虛。從不輕率准理。獨此案查閱前後情節。張令可謂荒謬萬狀矣。查彭金鰲之母彭黃氏在日。因金鰲多病。適族弟彭貴玉妻故。遺子金魁無依。經黃氏認爲己子。貴玉旋卽佔其房屋。黃氏控官退嗣。復經親族調處。令黃氏分給租課十七石。金魁帶業歸宗。此光緒十四年息

結之案也。二十二年黃氏身故。貴玉三次翻控。節經汪胡兩令嚴批不准。至張令任內。派金鰲捐錢六百串。已交三分之一。下餘四百串。抗交被押。貴玉乘機圖業。斗翻前案。小人貪妄。事理之常。無足怪者。獨不解張令何憑。何據。竟將金鰲斷爲姓馬。金鰲之妻斷爲姓彭。立將已故彭黃氏三十八歲之子。逐離門戶。將此家產一半歸彭貴玉承受。一半充公。如果彭金鰲以異姓瀆宗。則十餘年前互控處息之時。貴玉之祖尙在。何冒具稟。請銷親族彭如文等。何能任其瀆亂。貴玉金魁何以不卽時翻控。是貴玉之控。明因其嫂黃氏身故。弱姪易欺。又

窺該令正當勒捐不遂之時巧試其講張之技該令糊塗任性竟將人嫡派子孫立時斥逐祖遺家產官民平分如此斷案爭繼者欺天奪嗣問案者坐地分贓直是強盜作官良民尚有生路耶此案恐非興安府縣所能了俟卽日遴委委員速赴白河縣將全案人証卷宗飛提回省聽候本司親訊判斷仍仰興安府迅飭張令將訊斷此案緣由因何令親子改姓家產充公之處詳悉稟覆候奪該房卽具札稿送核勿延

批客民邵蔭棠呈詞

此案爾去年何月呈控何人何日斷令陳應鸞將舖底

清交爾於何月何日覆控應鸞何日潛逃賈世美窺爾
回籍何時具控長安長安縣何時將爾子管押來稟一
味含糊未便率准着另敘明白稟詞候奪

批蒲城縣商民楊海雲呈詞

爾被惡差屈德借端訛詐私刑拷打並將爾舖內銀錢
衣物擄掠一空爾不在縣具控輒來省垣瀆請提究爾
獨不聞越訴笞五十乎仰卽迅回蒲城縣具呈催案越
訴不准

批長安縣民牛金鴻呈詞

所控是否屬實仰西安府轉飭長安縣查明該村約潘

效岳等有無弊混抑係該十三家挾嫌妄瀆現在賑務
功虧一簣務令貧民終始沾恩勿任構訟爲要詞發仍
繳

批咸甯縣民張智明呈詞

此案既經前兩任訊斷有案稟委員何能將張姓之業
令劉姓霸買仰咸甯舒令檢查卷宗秉公親訊斷結仍
將訊斷情形據實稟復勿延詞發仍繳

批鄆縣土釐傅令稟

據稟已悉胡步瑗兄弟雖有應得之咎然已罰足蔽辜
劉大朋控涉虛誣足見不安本分此次姑從寬銷案以

後倘該武舉再來混濇嚴懲不貸此繳仍飭鄆縣李合知之

批長安縣李合弼臣稟

據稟黃良厥因糧構訟一案情形極爲明白曉暢持論亦極公平此案始於吳永春擅糶倉糧雷德彬挾嫌呈控兩造均非善類周故令斷令吳永春交卸倉事雷德彬歸還欠糧判斷亦頗平允繼而吳永春舉其姻親羅榮接充倉正雖曰接收清楚而此中弊混不問可知觀於羅榮甫充倉正卽請將糧石出放得息修倉明係覲加收以補吳姓之虧借修倉以邀縣批之准周故令並

不查詢倉之應修與否糧之當放與否賢然准其出易而羅榮遂得獨斷獨行將倉糧一齊糶賣此則前後兩倉正狼狽爲奸而實由於周故令之賴預無用也去冬饑饉薦臻倉空如洗吳羅之罪百喙奚辭惟雷德彬借鄉民乏食之故糾人向吳永春滋鬧託於公義實挾私嫌永春不自咎從前擅糶之非而但挾目前爭鬧之恨人不控彼彼先控人是張鍾秀等之上控實永春激之使然也此案屢經該印委等訊明將吳羅二蠹押追張鍾秀等自應遵斷息訟至於懲罰貪劣亦宜體諒人情當日出糶之價與荒年糧價懸殊羅榮錯在從前原不

料凶荒至此。今欲其照數買補。恐置之死地亦難如願。相儻況衡量有一定之經。何能將京斗強作市斗。此則張鍾秀等之偏人太甚也。來稟因張鍾秀等屢控不休。懇乞交讞局訊斷。殊可不必。本司以一批了事。查吳永春老而無恥。既將官糧擅賣。以爲侵盜之媒。復舉私親接充。以爲彌縫之計。居心實屬狡譎。惟其人已死。尙復何言。張鍾秀控人可也。控鬼何益乎。應勿庸議。羅榮以頂缸之釀。爲盜糧之鼠。誠屬罪有應得。惟其子已褫衣。負其身久繫縣庭。蕩產傾家。惡人惡報。張鍾秀等尙復蔓訟不休。亦可謂無惻隱之心矣。羅榮著照該令原斷。

將錢交足卽行釋放回村該父子永遠不准再預倉事此案經本司批結以後倘再有瀆控者定治以健訟之罪將此批牌示轅門俾眾周知此繳

批邵陽縣已革舉人秦殿熬呈詞

爾於光緒二十三年因圖姦池銀子之妻經邠州王牧詳請斥革查閱原卷池豆氏住窰窗扇有撬落痕跡脖項有搭傷指印爾夬成連池春管和親手書立認非字據經池春証明在卷爾之淫惡橫霸僅止斥革未辦餘罪已屬便宜乃事隔五年輒敢朦朧呈懇開復實屬膽大糊塗不准併飭

批臨潼縣夏令良材渭南縣余令紹僑會稟

此案情節本司久已洞悉馮西英父子因與馮義挾嫌
砍斃其媳馮黃氏嗣乃誣指馮義殺媳圖賴實屬凶狡
荒唐案未成招而西英在保病斃不可謂天道無知也
西英之妻馮斬氏因見其夫已死二子在押計圖免罪
遞控省垣茲據該兩縣訊明西英死由於病絕無凌虐
情弊應無庸議仍仰臨潼夏令速提要証馮順情等到
案秉公質訊務得確情按例擬解勿延

批長安縣民張富和呈詞

張元抗納糧錢爾不在案呈催輒請本司提究實屬荒

誕糊塗不准

批長安縣民郝應貞呈詞

爾恐縣詳不實然則爾稟卽一定可信乎可謂糊塗謬妄記責百板倘再妄瀆押發不貸

批安康縣舉人鍾隆鑑呈詞

此案查閱姜倅原詳爾分居叔祖鍾世蕙欠龍天輝之錢以稞抵債絕不與爾父子相干而爾父鍾遠猷充青泥舖保長因案革退自恃爲舉人之父橫行鄉里詳稱窩賭磕詐提府誣明追贓已非一次此案以不干己之事瀆告不休而又強取世蕙抵債之稞穀填己身盜食